

四庫全書

史部

欽定四庫全書

殿閣詞林記卷十七

明 黃佐

廖道南 撰

秘書

按周禮太史掌建邦之六典外史掌四方之志三皇五  
帝之書漢圖籍所在有石渠石室延閣廣內藏之於外  
府又有御史居殿中掌蘭臺秘書及麒麟天祿二閣藏  
之於內禁後漢圖書在東觀置秘書監又有鴻都等處

唐有秘書監集賢書院宋建昭文史館集賢院置大學士直學士修撰等官以掌之又有秘書省崇文館其重如此聖祖初定天下即遣使求遺書國初四庫之書多藏文華堂堂在禁中抵奉天門不百武車駕嘗幸臨之洪武三年三月庚子置秘書監秩正六品先除監丞一員直長二員十三年七月癸巳以內府書籍已有本院典籍掌之於是罷秘書監典籍張敏行者掌書籍中使傳宣索書即啓鑰以上歲時得燕見聖祖籍古右文其

勤如此蓋罷掌書之官併其任於翰林實自我朝始今  
內閣史館凡御製宸翰列聖寶訓實錄及玉牒副本經  
史子集類書之屬皆在焉永樂四年四月成祖視朝之  
暇輒御便殿閱書或召翰林儒臣講論嘗問文淵閣經  
史子籍皆備否學士解縉對曰經史粗備子籍尚多闕  
上曰士人家稍有餘貨皆欲積書況於朝廷可闕乎遂  
召禮部尚書鄭賜令擇通知典籍者四出搜求遺書且  
曰書籍不可較價直惟其所欲與之庶奇書可得又顧

縉等曰置書不難須常覽閱乃有益凡人積金玉亦欲遺子孫金玉之利有限書籍之利豈有窮也十六年遣修撰陳循往南京起取本閣所貯古今一切書籍自一部至百部以上各取一部北上餘悉封識收貯蓋兩京皆有儲書也十九年四月庚子夜奉天華蓋謹身三殿災火勢猛烈而奉天門東廡切近秘閣學士楊榮奮身直入麾武士三百人將御書圖籍并積歲制勅文章舁致東華門金水橋次明日上召諭之曰昨夜火發在目

前者幾人卿能收拾圖籍不避艱危可謂難矣因褒賞之於時書籍淆亂無紀典籍周翰理淆葺亂逾二載而後復舊今館閣書目蓋永樂間所定也自正統以前凡官本院者每朝退即入閣中檢所未見書蓋館閣無政事以討論考校為業故得縱觀中秘而受命進學者亦與焉景泰時編修周洪謨輩猶然其後始為內閣所扁鑰弘治五年五月大學士丘濬請訪求遺書馬上疏有云今內閣儲書有匱書目有簿皆可查考乞勅內閣量

委學士并講讀以下官督同典籍與史典班匠人等將書目較讐有無全欠分為經史子集四類及雜書類書二類開具奏報仍刻考較年月委官名銜識於卷末立案存照又勅兩京內外大臣會同南京禮部本院官查盤永樂中原留南京內府書籍有無全欠具數奏知於凡兩京書籍令南京國子監謄寫各令兩監藏之以備遺失夫國家採補佛道書以為藏經雕以文梓飾以文綾編賜天下寺觀儲以髹紅函匱載以金碧輪藏況此

書籍乃自古帝王傳心之要道經世之大典禮樂刑政制度文為之所具烏可吝惜小費而不為經久之計哉請勅內閣將書目付禮部抄謄分送直隸十三布政司提督學校憲臣用心設法訪求抄謄送京以補所未備仍於內閣近便去處別建重樓一所專用磚石累砌如民間所謂土庫者令內閣書辦中書等官遇其間暇抄謄累朝實錄各一部盛以銅匱度于樓之上層凡內府衙門收藏國家大事文書如玉牒之類皆附焉其制勅



房一應文書如詔冊誥勅書等項草檢行禮儀註應制詩文等項底本前朝遺文舊事等項雜錄亦各抄一部盛以鐵匱貯於樓之下層凡內府衙門所藏文書可備異日纂修一代全史之用者如永樂以前文武官貼黃之類皆附焉苟無禦災備急之具一或散失後之秉史筆者無所憑據往往求之於草澤訪之於傳聞簡牘無稽真贋莫辨非但大功異政不得紀載而明君良臣為人所誣捏者亦有之矣至若列聖實錄及聖祖御製等

書請依洪武六年纂集日厯以為寶訓事例勒成一書  
頒行天下如此則祖宗之功德在萬世永傳信而無疑  
國家之典章垂百王遞沿襲而有本所謂金匱石室豈  
虛文哉奉聖旨太祖御製書籍著翰林院打點見數收  
貯南京書籍查照目錄開寫缺少的去著守備同南京  
禮部翰林院點檢送來天下遺書禮部行移南北直隸  
十三布政司訪求至正德中權奸柄國典籍散逸嘉靖  
十三年七月令上勅館閣重書列聖寶訓實錄命大學

士李時等為經理官臣道南為管錄官肇建皇史宬于  
重華殿之西藏以金匱置之石室又於欽天閣樹碑以  
紀欽天記頌追先閣樹碑以紀祖德詩仍錫燕儒臣于  
謹身殿臣嘗誦呂祖謙表云帝暉下燭光榮河溫洛之  
藏天藻昭垂邁過沛橫汾之韻湛露示醇醲之惠承雲  
宣純繹之音若豫頌矣

開局

國初召儒臣載筆以定有天下之制分三局總之一曰

律局以定律令凡舊官之練憲章者居焉二曰禮局以究禮儀凡宿儒之通古制者居焉三曰誥局以撰誥命凡俊才之優文辭者居焉此開局之始也汪克寬曰洪武元年命中書省翰林太常寺率諸儒定擬三禮明年再命集議禮樂又明年徧徵在野道德文章之士分局相與訂正之其後纂修國史每分為十館以均六局之多寡六局一曰吏以究人材之進退二曰戶以蔽地利之盈縮三曰禮以考禮儀之沿革四曰兵以載軍政之

臧否五曰刑以書刑罰之祥濫六曰工以審力役之寬  
緩皆本六官職掌為之十館所修不能統一則擇人總  
勘如修他書則有不盡然者蓋自罷起居注之後本院  
職掌專文史遇有纂修旋設館席給筆札惟官長凡例  
是遵逐事呈稿筆削惟命其中雖有所見亦不敢盡用  
已意蓋官局修書從古然也

監修

洪武二年二月丙寅朔勅修元史以中書左丞相宣國

公李善長為監修不預史事三十五年十月己未重修  
太祖高皇帝實錄勅太子太師曹國公李景隆為監修  
都總裁官太子少保兵部尚書忠勤伯茹璫為副監修  
官永樂九年十月又重修之勅戶部尚書夏原吉太子  
少師姚廣孝監修未及成而廣孝死原吉獨專其事洪  
熙元年五月庚午朔勅修太宗皇帝實錄閏七月甲辰勅  
修仁宗皇帝實錄俱以太師英國公張輔少師兼吏部  
尚書蹇義少保兼太子少傅戶部尚書夏原吉監修自

永樂以來皆預秉筆與國初不同宣德十年九月庚午  
勅修宣宗皇帝實錄止用張輔為監修始復不預秉筆  
矣監修英宗皇帝實錄者會昌侯孫繼宗監修憲宗皇  
帝實錄英國公張懋監修孝宗皇帝實錄者亦懋也若  
修他書則罕設惟永樂元年七月修永樂大典以太子  
少師榮國公姚廣孝禮部尚書鄭賜為監修刑部左侍  
郎劉季篔副之餘不可盡書

總裁

國初修元史以前起居注宋濂漳州府通判王禕為總裁濂尋進學士禕拜待制三年二月乙丑續修元史仍為總裁太祖皇帝實錄總裁者始為禮部左侍郎兼學士董倫與侍講方希直重修為李景隆與侍講解縉再重修則文淵閣大學士兼左春坊大學士胡廣學士兼右庶子楊榮祭酒兼侍講胡儼也成祖仁宗兩朝實錄總裁為少傅兵部尚書兼華蓋殿大學士楊士奇太子少傅工部尚書兼謹身殿大學士楊榮太子少保禮部



尚書兼武英殿大學士金幼孜戶部尚書兼謹身殿大學士陳山禮部尚書兼華蓋殿大學士張瑛太常寺卿兼學士楊溥自是其柄始盡歸館閣矣宣宗皇帝實錄總裁為少傅工部尚書兼謹身殿大學士楊榮行在禮部尚書兼學士楊溥總裁兼纂修為詹事兼侍讀學士王直少詹事兼侍講學士王英總裁兼纂修前此未有也英宗皇帝實錄總裁為少保吏部尚書兼華蓋殿大學士李賢禮部尚書兼學士陳文兵部尚書兼學士彭

時副總裁為禮部右侍郎李紹太常寺少卿兼侍讀學士劉定之吳節副總裁蓋自此始紹雖為侍郎然發身則自翰林故與焉憲宗皇帝實錄總裁為少傅兼太子太師吏部尚書謹身殿大學士劉吉禮部尚書兼文淵閣大學士徐溥禮部右侍郎兼學士劉健副總裁為禮部尚書丘濬詹事府少詹事兼侍講學士汪諧孝宗皇帝實錄總裁為少師兼太子太師吏部尚書華蓋殿大學士李東陽少傅兼太子太傅吏部尚書謹身殿大學

士焦芳戶部尚書兼文淵閣大學士楊廷和副總裁為  
吏部左侍郎兼學士梁儲若纂修日歷惟洪武時有之  
總裁為學士承旨兼吏部尚書詹同侍講學士宋濂聖  
祖所修諸書多不可考獨太宗時永樂大典分局皆有  
總裁學士解縉修撰吳溥檢討王洪禮部郎中鄒濟布  
衣陳濟等皆得為之無慮十餘人蓋門彙多而事實繁  
故也大明一統志總裁為吏部尚書兼學士李賢太常  
寺少卿兼學士彭時學士呂原副總裁為學士林文劉

定之侍讀學士錢溥大明會典總裁為大學士李東陽  
焦芳楊廷和副總裁為學士梁儲若四書五經性理大  
全宋元資治通鑑綱目等書多不設總裁止用纂修官

### 纂修

國初纂修皆用山林隱逸之士洪武日歷纂修者皆儒  
士職官獨負外郎吳伯宗一人戊寅年勅修太祖皇帝  
實錄纂修可考者為侍讀學士兼太常寺少卿高遜志  
太常寺少卿廖昇都察院左僉都御史程本立禮部郎

中夏止善修撰李貫編修吳溥楊子榮劉觀檢討陳性  
善侍讀劉彥銘史官高讓吳勤趙友士端孝思張秉彛  
唐耕國子博士王縉僉事胡子昭知縣葉惠仲儒士楊  
士竒等永樂初重修太祖實錄纂修為學士王景禮部  
尚書李至剛侍讀胡靖曾日章王灌胡儼侍講鄒緝楊  
榮金幼孜楊士竒修撰李貫吳溥編修吳節鄭好義檢  
討王洪博士張伯穎王汝玉典籍沈度潘畿待詔王延  
齡給事中朱紘吏部郎中徐旭禮部郎中胡遠太常寺

博士錢仲益國子助教王達博士金玉鉉行人蔣驥晉  
府伴讀蘇伯厚僉事李煜葉砥知府劉辰靖江府教授  
張顯楚府教授吳勤知府鄒濟知縣楊觀梁潛王褒沈  
瑜趙季通唐雲教諭解榮劉宗平訓導富貴清羅師程  
儒士端禮王孟易朱逢吉莫士安凡外官生儒之預此  
者皆由本院官舉薦及再重修其纂修者學士兼諭德  
金幼孜楊士奇侍講學士曾棨侍讀兼贊善梁潛侍講  
王英修撰羅汝敬刑部主事李時勉陳敬宗也成祖仁

宗兩朝實錄纂修官為左春坊大學士兼侍讀學士曾榮右春坊大學士兼侍講學士王英右春坊庶子兼侍讀學士王直左春坊左諭德兼侍讀周述侍講李時勉錢習禮侍講余學夔陳循蘭從善蔣驥修撰苗衷曾鶴齡張洪劉永清編修周叙孫曰恭楊敬檢討周翰王雄楊翥五經博士陳繼戶部主事陳中四川道御史陳叔剛福建右叅議潘文奎知縣萬節教授丘錫教諭梁萼蓋自是不復用儒士矣宣宗皇帝實錄纂

修官為侍讀學士李時勉錢習禮侍讀學士陳循洗馬  
蘭從善侍讀苗衷曾鶴齡馬愉侍講高穀胡種邢寬修  
撰周叙尹鳳岐孫曰恭習嘉言陳叔剛陳詢曹鼎儀銘  
王一寧杜寧儲懋編修楊翥董璘楊壽夫林文鍾復主  
事劉球劉鉉洪與評事張益御史邵宏譽英宗皇帝實  
錄纂修官為學士柯潛萬安侍講學士李泰太常寺少  
卿兼侍讀孫賢劉珣左諭德黎淳右諭德童緣劉宣侍  
講江朝宗楊守陳修撰王一夔彭教編修尹直徐瓊陳



秉中李永通鄭環劉健汪諧張元禎吳鉞羅璟檢討耿  
裕周經纂修兼校正官為侍讀劉吉陳鑑侍講丘濬編  
修彭華蓋始自專用本院及詹事府官而纂修兼校正  
始見於此憲宗皇帝實錄纂修官為太常寺少卿兼侍  
讀傅瀚少詹事兼侍讀費閻左庶子兼侍讀謝遷右庶  
子兼侍讀陸簡侍讀曾彥楊守陟侍講劉戩王鏊楊傑  
梁儲左贊善張元禎修撰劉璣武衛張芮編修劉忠鄧  
掖黃珣張天瑞劉春涂瑞檢討楊時暢纂修兼校正官

為南京國子監祭酒李傑左庶子兼侍講學士李東陽  
左庶子兼侍讀吳寬右庶子兼侍講董鉞纂修兼叅對  
官為修撰楊廷和編修江瀾纂修兼叅對亦始見於此  
孝宗皇帝實錄纂修官為侍讀毛紀傅珪朱希同侍講  
豐熙沈濤吳一鵬修撰顧鼎臣編修汪俊李廷相溫仁  
和李時滕霄何瑋董玘檢討汪偉王九思潘辰至於修  
他書者不能盡記大率成化以後纂修皆純用本院官  
而永樂大典四書五經性理大全寰宇通志庶吉士亦

得與焉

催纂

洪武日厯設催纂官以侍講學士樂韶鳳為之永樂初  
重修太祖實錄催纂兼謄寫為禮部主事陸顯宣德初  
兩朝實錄因之以禮部主事張習為催纂宣宗實錄編  
修蕭鎡賴世隆吳節徐瑄檢討李紹王玉姜洪何宣主  
事潘勤正字沈寅俱為稽考叅對并催纂官英宗實錄  
以編修李東陽倪岳謝鐸焦芳陳音程敏政檢討吳希

賢吏部員外郎韓定中書舍人馬麟焦瑛李溥俱為催纂官憲宗實錄以禮部員外郎李通中書舍人胡清為催纂官自此始專用制勅誥勅官云

### 稽考

稽考叅對始自永樂洪熙兩朝實錄以修撰邢寬蔣禮胡種編修陳詢劉矩裴綸梁裡孔目沈寅為之蓋纂修之次也然寬乃永樂甲辰進士第一裡次之孫曰恭又次之寬裡同為稽考叅對宣宗實錄稽考叅對與催纂

併為一事英宗實錄因之止以催纂為名憲宗實錄以纂修者兼校正或兼叅對孝宗實錄稽考叅對者修撰呂柟編修崔銑湛若水翟鑿徐縉景暘檢討段炅易舒誥穆孔暉張邦奇及胡纘宗至是始復專設其賞格與催纂同

謄寫

洪武中修日歷謄寫用舉人監生永樂初重修太祖實錄以催纂者監謄寫官其謄寫用監生生負儒士凡二

十五人暨纂兩朝實錄改謄寫為謄錄用檢討許彬連  
智馬信周貴等四人中書舍人蕭湘等十八人郎中負  
外郎主事寺副等官程南雲等九人儒士生負各一人  
凡三十三人收掌文籍則為檢討胡讓典籍李錫牛麟  
張禮宣廟實錄有謄錄正副官凡二十九人又有謄藁  
官修撰黃裳編修許彬周貴中允蔣禮郎中何賢夏衡  
寺副石慶姚本溫良收掌則修撰胡讓寺副陳紀中書  
舍人靳通英廟實錄謄寫有太僕寺卿余濂山東叅議

林章禮部郎中吳謙中書舍人凌暉鴻臚主簿王佑白  
真序班毛顯譯字胡清徐德王臣凌遠共三十五人官  
雖不同大率皆制勅誥勅二房辦事者也



殿閣詞林記卷十七

欽定四庫全書

史部  
殿閣詞林記卷十八  
九

詳校官侍讀<sub>臣</sub>陳萬青

刑部郎中<sub>臣</sub>許兆椿覆勘

總校官進士<sub>臣</sub>繆琪

校對官編修<sub>臣</sub>莊通敏

謄錄監生<sub>臣</sub>楊鸞



欽定四庫全書

殿閣詞林記卷十八

明 黃佐

廖道南 撰

奏績

本院官凡歷俸連閏計三年例給由考滿六年九年皆然先具脚色事蹟及過名有無呈掌印官以憑考覈乃往吏部相見六品以下循廊至堂上送迎待以殊禮五品以上家宰迎至後堂賓主坐送出移咨都察院掌院

皆迎至後堂坐送出不計崇卑洪武十四年十月壬申定考覈之法翰林院等衙門為近侍不係常選官員任滿黜陟取自上裁蓋未嘗往吏部也十六年六月己卯吏部奏定考覈在京翰林院等衙門屬官俱從正官考覈各以功過稱職與否開具送部覆考從之永樂元年吏部奏准本院五品以上堂上官照例不考五年奏准詹事府六品以上官亦不考俟九年奏請黜陟而凡左右春坊司經局中書舍人俱不咨都察院惟吏部考覈

而本院官猶咨都察院劄付河南道覆考稍與洪武時異矣近凡考滿皆本部引奏復職六年亦然九年則考功司例差官送題作文不知起自何時大率皆非祖宗禮待文學侍從之舊也九年考滿該陞品級具奏請自上裁尚循舊典焉若考察之法或間一舉行成化四年令翰林院屬官并帶俸官譯字等官本院學士會同內閣考察弘治元年令翰林院官亦從吏部考察十年令兩京官照例考察惟翰林院學士不在五品之例百餘

年來儒臣未嘗玷清議自考察之典行修撰錢福編修孫清蓋由茲退者夫惟祖宗之世日勤晉接照臨雖遠不遺而何邇臣之能掩然既著為令甲耳目有攸寄矣嘉靖初學士以上自陳不入考察張孚敬桂萼自外入始專其柄矣

遷轉

聖祖定本院官為近侍清職凡遷轉皆出自上裁未嘗付諸銓衡百餘年來遵之不易然洪武中自本院官遷

轉者多大拜二年十月以應奉睢稼為中書省參政十  
九年二月以待詔朱善為文淵閣大學士三月以檢討  
茹太素為戶部尚書二十七年九月以少詹事任亨泰  
為禮部尚書二十八年四月以編修齊麟為禮部右侍  
郎盧原質為太常少卿六月命編修馬京署通政使司  
事已而拜禮部左侍郎二十九年正月以詹事府丞杜  
澤為吏部尚書左贊善門克新為禮部尚書又有依資  
格者三年十二月以侍讀學士魏觀為國子祭酒太史

令劉基為弘文館學士十二年十一月以修撰迨原霖為通政司右叅議十五年四月以正字魏德壽為春坊司直郎八月祭酒吳顯有罪以文淵閣大學士宋訥代之二十九年二月以修撰黃觀為尚寶司卿編修張顯宗為太常寺丞皆出親擢又有止在本院者如侍讀學士朱升為學士之類永樂遷轉亦止在本院獨永樂元年十一月舉人王偁以薦為檢討既命下成祖顧問左右曰檢討之下何官時曰博士典籍侍書待詔問曰除

人否復以已除對上嘆曰古所謂用人如積薪此類是已用人以賢以勞偁之賢既未可知勞亦未有而令賢有勞者居在下何以服其心遂命吏部凡翰林自博士以下皆陞職與偁同遂陞博士張伯穎王汝玉典籍沈度潘畿侍書蘇伯厚待詔王延齡劉宗平解榮皆檢討其後內閣陞擢漸至三孤洪熙宣德二朝任益隆矣自是本院遷轉非九年考滿則纂修書籍名雖親擢實則循資格也惟正統末侍講楊鼎徐理擢副都御史檢討

王詢擢大理寺丞各巡撫河南山東貴州等地方成化  
初修撰張頤擢僉都御史巡撫為殊典餘惟始遷詹事  
府左右春坊司經局轉吏部尚書侍郎以至內閣不及  
他途天順二年學士李紹陞禮部右侍郎實出上命及  
履任公卿往賀吏部尚書王翱舉酒酌曰天選侍郎也  
前此倖進者入奏事多南音上曰大臣以德選何以聲  
音為會祭酒缺吏部請以紹兼領之上謂王翱曰禮部  
不可無此人其別選代之翱退語同列曰我不知李侍





同寮勘結送吏部驗封司為不同耳其最異者洪武九年十一月學士承旨宋濂致仕詔贈其父原贈禮部侍郎諡文昭為嘉議大夫禮部尚書母德人陳氏為淑人祖德政贈亞中大夫太常寺少卿祖妣金氏贈淑人妻賈氏封亦如之誥辭皆親製稱濂有曰德量之弘如千頃陂澄之不清撓之不濁天下榮之成化十五年少詹事兼學士王獻滿三載乞恩貤封父母詔如其官嘉靖六年臣道南考滿吏部考語云多見多聞抱出羣之志

有學有行負經世之才都察院考語云名高湖海學博古而識達天人器重台階文華國而力追秦漢蒙恩錫父母本身妻勅命十三年考滿復荷特旨廖道南日侍講讀効有勤勞伊父母應得誥命准給與他

改調

吳二年修換朱夢炎轉山西行省員外郎此改調外擢之始也洪武三年學士陶安出為江西行省參政八年編修朱右以稽古不能詳上譴之出為晉府長史九年

編修張鳳擢廣西行省參政十六年八月以侍講學士  
李紳為浙江右布政使左春坊正字魏德壽為江西右  
布政使二十五年八月左春坊大學士董倫出為河南  
左參議自是近侍文學之臣或遂以為例永樂初淇國  
公丘福以儲位未建請立漢王高煦上詔學士解縉定  
議然秘未發明年立皇太子又明年福等所議泄於外  
高煦言於上曰藩府之舊泄者其維縉乎遂出縉為廣  
西右參議又有出自薦舉者正統元年正月大學士楊

士奇舉侍講劉永清才堪繁劇出為廣東右布政使十三年十月侍講學士陳文亦以大學士高穀薦出為雲南右布政使成化二十三年司經局洗馬羅璟服闋至京為鄉人陰中調南京禮部員外郎弘治十一年庶子王臣以事出為廣西左叅政若洪武初起居注王禕出為南康府同知特賜金帶寵勞之復詔自漳州判為待制特歷試以難劇且出於寵勞非左遷也正德時學士張芮或咎其無文名逆瑾用事遂出為鎮江府同知修

撰何瑋以抗直不詭逆瑾出為開封府同知大率本院  
官外擢皆陞高位無有對品調者若王禕則出自聖祖  
親擢云

謫譴

洪武中本院官降為屬官或國子及風憲等職元年十  
月以直學士詹同侍讀學士秦裕伯為待制此謫調之  
始也三年十一月學士宋濂待制王禕坐失朝降為編  
修八年七月降修撰達魯與權為典籍九年十月降編

修朱孟辯為中書舍人十二年十二月降待制吳沈為  
編修十三年六月復官尋改典籍拜東閣大學士十六  
年八月降東閣大學士吳沈為侍書以進講後期考功  
監刻之尋改為國子博士十五年華蓋殿大學士邵質  
降監察御史二十二年十二月降學士劉三吾為國子  
博士侍講學士葛鈞為助教三吾等受命授晉王世子  
經吏部侍郎侯庸劾奏三吾等在職怠惰宜黜降別用  
上曰儒者不任劇事令教國子未幾復職二十四年鈞

以稽古不稱旨仍降助教三十年編修景清改御史其  
後侍講戴德彞編修尹昌隆亦然洪熙初侍講李時勉  
以言事降交趾道御史修撰羅汝敬亦以言事降雲南  
道御史此皆內任者洪武四年八月侍讀學士魏觀坐  
考禮不以時謫龍南知縣編修宋濂坐祭孔子遲慢謫  
安遠知縣五年二月召致仕學士詹同等至京師賜宴  
奉天門復觀與濂為禮部主事十二月擢觀國子祭酒  
兼太子贊善大夫此謫外復任之始也九年六月修撰



朱善以家屬不完謫教遼東未至賜還鄉十五年三月  
謫編修吳沈為臨洮府渭源縣學教諭未行復以為典  
籍十六年典籍吳伯宗降太常寺丞不拜又除國子司  
業又辭忤旨貶金縣教諭正統中編修賴世隆坐事降浙  
江台州府經歷後召還已卒天順中修撰丘玉謫廣東  
欽州同知未行復令編成曹石譜之故也成化元年學  
士黃諫坐罪降廣州府通判二年侍讀學士錢溥坐罪  
降順德縣知縣三年修撰羅倫以言大學士李賢奪情

起復事忤旨降福建泉州市舶提舉五年編修章懋黃仲昭檢討莊杲同疏諫上元燈火上怒杖之調懋及仲昭為知縣杲為判官未行用給事中毛弘言改懋及仲昭南京大理評事杲南京行人司副未幾召倫還復秩時謂翰林四諫十二年學士江朝宗坐事降廣東市舶提舉正統初逆瑾用事凡修孝廟實錄者擠黜大半修會典者亦褫其秩於是侍讀徐穆編修汪俊等俱謫南京部屬等官亦有降知縣者皆以擴充政務為名迨武

宗南巡修撰舒芬編修王思江暉馬汝驥上疏諫語多直慙武宗乃謫芬為廣東提舉思為三河驛丞暉汝驥為知州嘉靖初修撰呂柟編修鄒守益以言禮柟謫判解州守益判廣德張孚敬又以擴充政事謫侍讀崔桐修撰楊維聰等十二年七月詹事顧鼎臣輪講衍義不到席春讒譖乃謫臣道南判徽州蔡昂判湖州十三年三月今上祀帝社稷壇問日講官五員如何少兩員司禮監查名張孚敬即擬伊甥祭酒王激等補充講官上

曰見今侍從人少廖道南蔡昂著取回復職照舊供事

起用

洪武元年起故元學士承旨危素學士張以寧王時等  
至京師以素及時為侍講學士以寧為侍讀學士又起  
前起居注王禕為待制兼國史院編修官十六年驛召  
金縣教諭吳伯宗除檢討尋拜武英殿大學士以薦舉  
失人出知三河縣復召為檢討十七年上思用老成驛  
召前修撰朱善于家授待詔尋拜文淵閣大學士三十

一年前河南左叅議董倫至自雲南拜禮部左侍郎兼  
學士又起漢中府學教授方孝孺為侍講前御史解縉  
為待詔永樂二十八年八月仁宗起左春坊大學士黃  
淮于獄命為通政使兼武英殿大學士又起前司經局  
洗馬兼編修楊溥復其官尋陞學士正統四年查本院  
剩員檢討李紹等放歸田里期年驛召復任天順八年  
前修撰岳正自戍所召還未及用憲宗即位詔復正原  
職吏部言當調南京有旨勿調命充經筵官成化二年

閏三月復順德知縣錢溥為侍讀學士致仕尋起為南  
京禮部侍郎三年三月起用前學士商輅于內閣五年  
七月起前學士倪謙復職尋進禮部右侍郎六年復市  
舶提舉羅倫為修撰弘治初侍講謝鐸編修張元貞自  
養疾起編修王敕自外謫起為四川提學僉事南京禮  
部員外郎羅璟為福建提學副使十年五月侍讀學士  
致仕程敏政前左庶子張昇皆復官正德五年逆瑾誅  
起南京兵部員外郎徐穆等為侍讀等官處州府同知

張芮亦起為南京尚寶司卿尋擢南京太常寺卿檢討  
劉瑞起自外謫為浙江提學副使十六年前修撰何塘  
亦起自外謫為副使提學山西云

### 起復

國初隆重儒臣惟以孝德學士宋濂待制王禕皆奪情  
起復其前後扣筭年月以詔臣子移孝為忠也惟永樂  
六年學士楊榮居父喪給傳歸既葬遂命起復是年冬  
復居母喪奏歸守制時已下詔巡北京不許九年春奉

命始葬奔喪遣中使護送榮還時洗馬楊溥丁父憂詔奪情起為侍讀二十二年大學士黃淮丁母憂乞守制不許特命乘傳奔喪起復內閣視事洪熙元年大學士金幼孜亦丁母憂宣宗召修兩朝實錄起為總裁官正統十四年八月修撰彭時居母憂遣校尉至門宣喚入朝與商輅及陳循每辦事時具啓辭不允奪情辦事景泰七年少詹事劉鉉丁母憂欲奪情起之力求終制成化初大學士李賢遭喪去官詔留之修撰羅倫詣其私



第告以不可賢始以其言為然既數日倫上疏陳古今起復之非且曰如其不然必準富弼故事終喪劉珙故事言事卒口誦兩句云爾來閣下考三考我去家中眠一眠語雖戲而對亦切蓋當時考吏必集閣下於此可見

### 清黃

會典云凡兵部清理武官貼黃奏請命學士等官一員同該部及法司堂上官於闕右門清理本院官專管撰

述

閱武

會典云凡該繼軍丁告願科舉者兵部奏送本院出題  
考試批定中否送本院施行按景泰元年盧龍軍士劉  
宣弘治五年府軍前衛軍姚學禮皆發解第一然則  
軍士中不可謂無人要在甄鑒之爾

稽課

會典云凡國子監生課簿按月送內閣稽考凡精微文

簿所自置殆不可考按永樂元年司禮監請如舊制鑄  
出入精微印從之則是廢而復置也會典云凡五府六  
部都察院等衙門關給內府精微文簿開寫日行事務  
註銷前件按月奏送本院稽考年終類送司禮監交收

譯課

洪武十五年命侍講太原潔等編華夷譯語以言無文  
字但借高昌之書製蒙古字以通天下之言至是乃命  
原潔以華語譯其語天文地理人事物類服食器用靡

不具載復取元秘史參考紐切諧音既成刊行之譯字  
官隸本院蓋始於此永樂中上選太學生年少者習四  
夷諸番字諸生多不欲輒生謗議上怒將罪之學士楊  
榮力救得免遂命榮掌之榮訓勵得宜自是帖服率皆  
有成有官至五品六品者宣德元年兼選官民子弟委  
官為教師本院學士稽考課程後內閣委官提督弘治  
元年奏准科目出身四品以上官二員提督三年奏准  
子弟不許別圖出身三年後考中食糧月給米一石又

三年考中冠帶為譯字官三年考中授序班職事監生  
初入館照坐監例食糧三年考中食糧一石又三年考  
中授從八品職事其曾習業者非精通譯字不准應試  
八年奏准子弟有願習舉業者考送順天府應試按自  
後提督官例用太常寺卿及少卿而景泰天順間譯字  
官多有取進士者甲申庶吉士劉淳自譯字官發身後  
為中書舍人陞吏部員外郎云

給假

在京官凡省親展墓歸娶及送子還鄉改葬先墓具有定制獨本院儒臣多出特恩宋濂在國初壬寅年八月告歸省親有白金文綺之賜編修張藻仲歸娶給驛舟并賜寶鈔七年十一月皇太子臨大本堂召東宮贊讀凡二十五人立庭下親面諭之有云茲聞爾諸臣離父母去墳墓者三年矣今冬氣向深草木搖落寧不動懷土之情乎吾已為爾請于上宜各旋歸毋久淹為也因出內府錢分賜以為道塗費永樂元年七月侍講楊榮

請告歸省給驛十月榮以妻喪復詔乘傳歸葬仁宗即位詔百官有違親三年以上者聽給告歸省於是大學士金幼孜首奏省母左春坊大學士王英亦乞歸省皆俾馳驛往還賜賚甚厚宣宗初特詔翰林諸詞臣還鄉焚黃宣德元年三月學士楊溥得告歸省其母于時不得見者十有八年矣十月大學士張英給告省父侍讀曾鶴齡告歸省亦俞允正統初大學士楊士奇還鄉展墓甫數旬而還二年十二月右諭德黎恬在任甫五年

謁告歸展先墓賜道里費給驛舟五年二月少師楊士  
奇展墓上錫之金綺前此未有也宣德六年二月編修  
謝璉初考馳封二親給告歸省十二年四月學士馬愉  
以父病乞歸省允之賜以驛騎并藥餌費天順初洗馬  
柯潛拜尚寶少卿兼職如故即告歸省修撰王獻入仕  
僅五年亦得賜歸省皆給驛往還成化元年南京禮部  
尚書倪謙致仕其子編修岳予告省親及謙疾乞歸省  
得終制二年大學士彭時乞歸省給驛往還命太監許



安致道里費長隨張敬護送抵家未踰月促還朝明年  
二月至上慰勞之弘治中侍讀學士傅瀚在任二十四  
年乞歸省許之學士張芮諭德蔣冕乞歸省給驛編修  
謝丕省親亦從其請正德中編修孫紹祖修撰唐臯乞  
歸改葬俱給驛嘉靖中左庶子童承叙乞歸展墓亦如  
之

休告

洪武中宋濂歸聖祖問之曰爾往傳命俾歸養金華山

中父子祖孫懽然同聚疾必易愈且速造朝國家文翰庶有賴哉及宣上旨濂力疾起拜命越翼日陞辭上勅黃門內使出大府金鑑以束帛賜之自是候問之使相屬于道時方嚴肩輿之禁雖相國亦不之許特命造安車給健丁六人以載此尤異數也又數日皇太子以舊學故復遣內臣存問賚以金幣又二日啓行夏四月十七日始抵金華故居十八日具謝表一通進上東朝上謂太子曰此書汝當日誦一過復親御翰墨賜書褒

答其文則上所自製字乃侍臣代書其外封九字內年  
月六字及花押則御筆也復出官局文綺白金各一命  
皇太子署名緘封遣使者即其家以賜六月七日也濂  
之自叙如此聖祖禮遇文儒可謂隆矣宣德初大學士  
黃淮乞骸骨不許固請始令歸田養疾賜楮鏹萬貫陞  
辭加賜萬貫既歸遂乞致仕丁外艱賜祭墓以一品禮  
淮入謝賜遊西苑召淮之子采從行且特命乘肩輿登  
萬歲山賜宴于山之麓淮獻詩以謝上悅比辭宴餞于

太液池親灑宸翰製詩送給路費賜金綺五年召修會典遷學士充日講官兼侍東宮講讀數月以母憂去

侍養

洪武中太子贊善大夫和希文言于東朝曰小臣有母春秋高八十有四矣無他兄弟以為養臣行年亦且六十雖有子僅四歲耳烏烏私情其能已乎言訖潸然出涕皇太子以其言聞詔許歸養此後侍親者多允弘治四年南京侍講學士張元禎以母老乞謝病歸六年編

修劉存業乞歸亦如之

迎養

國初嘗令在京官員有親者許迎養永樂中修撰羅汝敬之父以明就養京師朝見畢謁皇太子于文華殿特加問勞命大官賜膳人皆榮之黃淮之父性累封至右春坊大學士仁宗監國屢問安否嘗賜瓊玉膏一器天順中李賢之父昇封少保吏部尚書兼大學士以貤恩詣闕謝就養者數月及陞辭上特賜寶鏹三千貫因顧

謂賢曰先生已盡天倫之樂乎賢頓首曰臣父子所以有今日者皆陛下之賜也迎養父母者尚多有之而其特蒙優賜惟三數公為然

養疾

國初乙巳年春起居注宋濂三月卧京師之邸舍不入侍者六日上顧近臣曰老宋起居何久不見耶因言其致疾之詳上憂形於色曰宋起居純實之士不參以分毫人偽侍予五年猶一日也不知何以有斯疾乎越一

日又問病勢稍損否對曰如初賜紗衣一襲且諭之曰  
明年朕生日卿其復來如期至上留之數月乃還正統  
元年編修楊珙養疾詔許之天順末禮部侍郎兼學士  
李紹為修實錄副總裁書垂成感微疾即上章求解任  
不允成化二年八月上察其誠許暫歸候疾愈復來七  
年用國初例劉崧署司業復起為祭酒降勅召之未及  
門而紹卒矣三年編修張元禎謝病得允家居者二十  
二年孝宗即位乃起為左贊善二十三年太子少保禮

部尚書兼學士彭華始得風疾上命醫往視遣中官賜羊酒蔬米越三月辭祿不許又三月進令官賜麒麟服再辭辭益懇乃獲允俾歸就醫藥疾已即來瀕行又賜金綺襲衣輿疾出都城過闕門匍匐稽顙因淚下沾臆而去弘治四年少詹事兼侍講學士汪諧疾作在告三月上疏請停俸給不許每時賜珍味憲廟實錄成以副總裁陞禮部右侍郎明年復懇辭乃許之十六年禮部右侍郎掌國子監事謝鐸以疾在告累疏乃允歸就醫



命給驛以行有司俟病愈奏聞蓋養疾得給驛者惟本院遂為例焉

辭職

洪武初故元温州路教授江寧陳遇隱居于家以謀臣秦從龍薦召見上與語大悅即拜學士固辭不受命其後徵聘之士膺館職不拜者多從其請國子學正蘇伯衡擢編修官以曠辭歸已而學士承旨宋濂致仕將還上命舉可自代者即以伯衡應詔既復固辭上憫其誠

賜文綺賞之俾老焉天順中吳與弼辭左諭德語在薦  
舉類皆高尚其志者也

優老

吳元年十一月詔以侍講學士宋升年老特免朝謁洪武  
二年以危素為侍講學士尋兼弘文館學士賜小車免  
朝謁七年五月命學士承旨罷所兼職待以優禮又以  
大學士宋濂老而艱於行步特命皇太子選良馬以賜  
上御製白馬歌令羣臣賡和示寵輝焉永樂中學士曾榮

年踰六十有痰疾一日侍朝遽引退上見之敕免當日  
朝宣德中上念先朝老臣尚書兼詹事蹇義大學士楊  
榮等四人皆春秋高並賜勅褒諭命輟職務朝夕左右  
侍論議賜玉帶及御製詩畫以見優寵正統時學士王  
直累遷至尚書年近八十特詔免朝謁學士王英亦  
累遷至禮部侍郎上章乞休者屢矣十三年八月上特  
陞英為南京禮部尚書謝恩之日內傳旨曰以卿久任  
多効勤勞進秩南京俾得安逸弘治十年少傅兼太子

少傅吏部尚書謹身殿大學士徐溥年七十以疾在告  
上疏辭不許命醫診視遣中使賜羊酒楮幣仍令風雨  
及寒暑免朝蓋成周尊禮黃耆俾耆壽俊在服遺意

致仕

洪武七年學士承旨詹同既復任將以年請老不敢言  
上知之八月甲辰詔致仕官其一子魯召同入賜坐從  
容慰勞之夜漏十刻始勅內官扶掖而出乙巳新製文  
一篇以賜九年十一月學士承旨宋濂致仕將行上曰

卿去何時復來見朕乎幸相待數日始徐徐行由是留者數月十年二月遂辭歸瀕行賜紙幣文綺及御製文集皇太子贈以衣三襲上論曰朕最慎于賞予卿忠誠可貫金石故以是賜卿今年幾何矣曰六十有八上曰藏此綺俟三十二年後作百歲衣也濂叩首謝上復曰大江漲不可舟宜循內河達家庶幾無虞仍俾其孫中書舍人慎護行濂至家即拜表遣慎詣闕稱謝仍上箋皇太子申明正心治國之要上賜詔褒答謂忠良之臣

勲業既著文章必傳功成身退惟卿獨全耳濂辭時請  
歲一來朝是年九月朔遂入朝越十有四日陞見上佇  
想已久廷問屢矣及見大喜加勞再三皇太子諸王皆  
驩顏動色翌日上降勅符遣儀曹賜醪珍膳諸物抵寓  
館自是日侍上游盤旋禁籞咨詢備至便殿侍食日晏  
始退恩禮之優羣臣莫敢望上嘗喟然嘆曰純臣哉爾  
濂純臣哉爾濂方今四夷皆知卿名卿其自愛濂避謝  
不敢當凡所陳論皆古格言朝廷百官惟恐濂不見留

守人衛卒見濂亦皆以手加額推排迎拜留凡七旬餘以歲暮力辭還復遣中貴人賜上尊至於道所經行皆上為之指畫既行數日上問其子璲曰爾父道中無恙否璲以安對未幾復謂璲曰朕疇昔之夜夢見爾父笑談如曩時爾父雖去其容儀儼然在朕目中也璲叩首謝曰非陛下垂念臣父之至何以形諸夢寐於是中書舍人史靖可太子正字桂彥良皆為歌詩以紀之八年正月修撰李叔允以年老乞致仕從之七月待制王俱致

仕賜以綺帛給舟車還鄉十年八月賜應奉陳傳還御製詩文賜之十一年四月賜編修張美和致仕製文贈之有曰千載一遇今古之通言然全於始終者罕矣卿善始善終不亦美乎八年七月賜待制王傑致仕十四年九月賜修撰趙新致仕十五年十二月賜文華殿大學士兼左中允全思誠致仕並加優禮十八年九月文淵閣大學士朱善邁危疾上命醫治月餘增劇遣其子逢掖詣闕上訴得告歸十九年二月左思直郎汪仲魯



請老上期秋至乃俞其請三月肱上御奉天門召仲魯  
至賜坐顧曰若知所以見召乎起對曰不知曰昨期秋  
方許爾歸已乃思之若等光陰有限矧喘嗽誠未易痊  
即今還鄉無庸再來矣所戒者近侍之歸郡邑官或來  
見當閉門謝之否則筆之于簡俾僮僕示之若曰仲魯  
幸蒙聖恩予告還鄉理宜杜門謝客輸租應役則有恒  
制矣其敢以自是速厥戾如是則可考終矣仲魯叩首  
謝明日陞辭而還洪熙元年春國子祭酒兼侍講掌本

院事胡儼以疾辭加授太子賓客致仕賜璽書褒美復其子孫詔給舟車楮幣為道里費未幾侍講余鼎修撰桂宗儒以疾陳乞致仕許之英宗復辟大學士高穀懇乞休上憫其老特允之賜白金楮幣織金襲衣給驛舟送歸其鄉賜勅褒之學士薛瑄入閣數月見將臣石亨等竊弄威福嘆曰君子見幾而作豈俟終日乎遂引疾乞休成化十三年太子少保吏部尚書兼謹身殿大學士商輅以疾致仕詔陞少保兼職如故賜璽書金幣襲

衣寶鏹給驛以歸孝宗登極少師兼大學士徐溥以目  
眚致仕特加優渥焉正德初逆瑾用事少師兼大學士  
劉健少保兼大學士謝遷皆致仕而少傅兼大學士李  
東陽獨留其和遷登舟見寄詩有曰天外冥鴻君得志  
池邊蹲鳳我何人蓋自傷也東陽於是調和其間瑾誅  
後累加至少師食正一品俸致仕歲時賜鮮及頒上尊  
珍饌與任事時同郊祀慶成光祿猶致宴皆先是所未  
有者

宥過

本院刑名屬刑部山西清吏司及大理寺左寺糾覈過名則屬河南道御史然祖宗時禮重儒紳多見宥免洪武初有御史言學士陶安隱過上曰朕素知安安豈有此且爾何由知之對曰風聞上責之曰道聽塗說以毀譽人以此為盡職乎不得已而本院官以失議見呵正字桂彥良奏言當取所長略其短上曰不然吾因其長而拔其短以造其全耳九年十月壬午上御午門樓學

士承旨宋濂編修傅藻奏事由左門入監察御史吉昌等劾之詔皆宥之他日濂又以事情見責上製其誥詞有曰使爾檢閱則有餘用之於施行則甚有不足蓋惜之也二十二年八月監察御史蔡新奏覈諸司案牘稽遲者請速問之詔貸其罪以移文責報惟翰林院勿問二十五年閏十二月學士劉三吾自陳子壻戶部尚書趙勉夫婦坐贓皆緣失教自當引退以勵廉恥遂免其官明年九月復職永樂中侍講曾榮起復扈從同邑有

坐奸黨事連祭者人以為危成祖特原之曰朕惜爾才也所居西長安門外家人不戒火延及禁垣亦以祭故不問編修楊敬便道過家有司奏其冒支廩給擅役驛遞人夫上怒曰敬奉朕命奈何辱之詔不問水東日記云凡大班奏事有常規亦多所司預進事目惟正統戊辰狀元彭時謝恩以夜坐久誤入朝被劾上赦之國家之禮重儒臣如此

宥親

永樂六年上北巡命楊士竒輔導明年其同母弟羅京  
以事當徙北京為民士竒顧其子尚幼而母墓兼守之  
者乃以情白仁宗乞留京不徙且言京兄弟二人凡從  
戍遠方京復當徙困苦流離有足矜者辭意甚懇切監  
國憫之遂以京給士竒并開羅氏軍籍學士楊溥江陵  
產也國初江陵人有南徼之戍什伍連屬楊氏亦隸籍  
焉其地在瘴鄉往戍者多不得生還追逮無虛歲溥母  
甚厭苦之溥乘間以聞上優詔復其家

擬諡

國初追尊四代考妣為帝后尊諡皆儒臣擬奏請旨孝  
慈皇后懿文皇太子亦然洪武二十五年詔凡親王及  
功臣賜諡令禮部行本院擬奏請旨弘治十五年奏准  
文武大臣有請諡者本部照例上請得旨行吏兵二部  
備查實蹟禮部定有上中下三等開送本院擬奏請旨  
本部抄出施行親王例用一字郡王二字其文武大臣  
亦用二字若官未高品而侍從有勞或以死勤事特恩



賜諡者不拘常例本院官有諡始自洪武末時王禕賜諡文節自是曾入翰林院者俱用文為諡如胡廣諡文穆之類亦有以名避者惟大學士陳文諡莊靖翰林之外得諡為文魏驥文靖吳訥文恪姚夔文敏葉盛文莊何喬新文肅皆異數也

### 卹典

成憲凡學士大學士以一品兼者及贈一品者其歿也賜祭四壇若父母妻則一壇以侍郎兼學士贈尚書者

賜祭二壇他官四品以下無有卹典惟本院最為崇異  
洪武二十四年十月編修唐震卒于四川命禮部遣官  
往祭之仍命還其喪于京師二十三年十月編修羅原  
質奔父喪詔賜驛舟楮幣遣歸辛巳年九月修撰王良  
卒遣禮部左侍郎黃觀諭祭宣德七年少詹事兼侍講  
學士王英丁母憂上命禮部賜祭工部造墳遣中官阮  
童護之奔喪尋奪情起用成化四年學士柯潛丁父憂  
有司請賜祭有旨并與葬六年正月復丁母憂遣官諭

祭五品父母有卹典自潛始也七年左庶子兼侍講徐溥丁父憂特遣官賜祭十三年溥以少詹事兼侍講學士丁母憂賜白金楮幣及葬祭二十年侍講學士李東陽丁父憂賜祭一壇正德初學士張芮以宮恩加從四品俸丁母憂賜葬祭嘉靖十五年七月臣道南奉勅管校列聖寶訓實錄聞母宜人江氏憂禮部以聞今上親批云廖道南日侍講讀効有勤勞伊母准照例與祭葬還著給驛十一月遣左叅政陳渙代諭祭仍命工部造

墳十六年六月接丁父主事五洪公憂上命與祭一壇  
開墻安葬遣右叅政劉儲秀行禮又該大學士李時題  
為進呈事欽奉聖旨廖道南候服制滿日陞一級用還  
賞銀三十兩紵絲一表裏蓋前此所未有也

殿閣詞林記卷十八

欽定四庫全書

殿閣詞林記卷十九

明 黃佐

廖道南 撰

齋詔

國初置承勅監洪武九年以編修吳昇為承勅監令周孟東為監丞使以齋奉制勅為職尋罷之其後凡朝廷大禮頒詔天下本院官先撰詔文請旨裁定付中書舍人書寫送尚寶司用寶璽畢行禮之日百官出承天門

外肅候鴻臚寺官唱頌詔內閣官一員捧詔自奉天殿  
左門入至華蓋殿候駕興捧出至奉天殿授於禮部尚  
書其他制勅用寶時或不同皆內閣臨事制宜取自上  
裁葉盛云嘗見勅內閣楊士奇用勤民之璽皇太后遺  
詔用弘德昭順之寶皇后制書用厚載之記詔書制諭  
臣誥命皆制誥之寶近年詔書蓋皇帝之寶云始於學  
士李賢制命勅諭皆勅命之寶又嘗見正統中手摺印  
本勅諭廣運之寶朝覲勅諭亦手摺印本蓋敬天勤民

之寶勅則用廣運之寶勅今皆為勅書蓋手勅耳惟景泰初勅諭亦用廣運之寶今上御劄新製政事文學驗記聖文神武非近世帝王所及也

### 寶冊

凡上尊號尊謚皆本院撰擬寶冊文以進洪武初尊德懿熙仁為四廟學士陶安朱升等捧冊文至御前上親受之永樂初上太祖高皇帝孝慈高皇后謚議上御覽畢親舉謚議付本院撰文及上謚冊一如洪武時天順

二年二月上聖烈慈壽皇太后尊號內閣捧寶冊文進上復親覽畢乃行禮時詔誥天下詔草已進訖大學士彭時謂李賢曰此事有恩典及人賢曰先年已兩赦矣恐數赦非宜時曰非赦也但行優老之政耳意欲令朝官父母年七十者與誥勅百姓年近百歲者與冠帶是所謂老吾老以及人之老也恩典如此斯與所上徽號相稱矣賢曰善遂共擬仁政數條進呈上大悅即命之頒徽號詔畢上御文華殿召賢等三人者令近前賜銀



兩表裏有差仍親自授與和顏慰勉其鼓舞臣下有如此今上恭上皇天泰號暨聖祖徽號誕敷大詔錫類馳封尊尊親親道兼舉矣

### 扈從

凡車駕所在近侍諸臣皆扈從洪武中官無定員永樂初定巡狩親征先詔誥天下扈從用本院內閣官三員侍講修撰典籍等官六員書制勅秀才八人譯寫四夷文字監生十三人車駕將發燕羣臣賜扈從官軍人等

寶鈔會典云凡駕詣郊壇或巡狩行幸親征內閣官扈從制勅房官隨行書辦遇有勅旨即時撰寫永樂七年正月車駕巡北京學士胡廣諭德楊榮金幼孜及修撰王英等扈從賜錦衣狐裘鞍馬榮時有母喪特留之三月抵北京賜廣等宴榮辭以憂弗與特命中官以珍饌送之八年二月上親征北番布尼雅實哩廣等三人仍扈從賜衣被鞍馬途次命光祿給酒饌七月車駕至臚胸河遣榮先歸報皇太子至京皇太子賜鈔幣金織麒麟

衣服銀相鏤花香帶及石刻蘭亭記兩賜宴於翰林命  
隆平侯張信尚書蹇義款待且命諸儒臣陪之八月抵  
北京賜絳幣鈔米羊酒等物十月榮與廣等扈駕南還  
賜鞍馬綿衣褲襪及路費途中屢賜珍饌嘉果抵京賜  
廣等鈔幣有差十一年正月復巡北京統師親征廣等  
三人偕修撰王直梁潛扈從賜衣帶鈔米等物十二年  
三月親征衛喇特時皇長孫侍行上命廣等三人凡行營  
有暇即與講解義理經書史鑑十四年復扈從南歸賜

廣等錦衣鞍馬鈔幣十五年三月壬子車駕復巡北京  
三人者復扈從上屢問民情榮等悉以實對賜白金鈔  
幣金織紗羅紵絲衣服等物二十年二月上北征惟幼  
孜與侍講王英扈從賜鞍馬鈔幣前至庫稜海五月遂  
還英嘗奏事上喜謂曰秀才是二十八人讀書者朕需  
爾為用正好宣力勿憚勞苦令凡軍中一切動靜或謠  
言之類爾有所聞即來奏又諭太監孟驥曰秀才有事  
即令入見毋阻二十年二月戊寅大學士楊榮金幼孜

從征沙漠賜米鈔鞍馬令榮等參預軍中幾務時召榮  
幼孜於御幄中同公侯大臣坐飲凡有賜賚或公侯不  
與俱或與公侯俱而扈從文臣不與焉九月宴隨征將  
士命榮幼孜坐前列食上穀賜鈔幣拜二品金織襲衣  
靴鞵二十一年七月榮扈從西征賜羊酒帳房等物八  
月庚申駐師萬全一應軍務悉命榮掌之晝夜或三接  
五接每以楊學士稱之不名十月次天成番王額森托  
噶納款命榮往受之回賜御饌慰勞備至十一月旋師

賜鈔一萬貫米十石紵絲金織衣二襲靴襪二雙二十  
二年復北征榮與幼孜扈從語見受顧命類宣德元年  
漢庶人高煦反榮勸上親征遂與楊士奇從行討平之  
七月駕還賜榮鞍馬白金鈔幣及樂安州男婦五十餘  
人三年八月戊申車駕巡邊獨榮扈從九月癸丑給以  
內廐良馬命榮先從出塞日賜御厨酒饌乙卯師次寬  
河報捷丁巳駐蹕會州甲子班師五年二月乙未上侍  
皇太后謁長陵獻陵大學士楊士奇楊榮等扈從庚子

上以皇太后命召見士奇等五人於行殿諭之曰皇帝  
數言卿等忠勤今天下清寧民生無事是固祖宗福祐  
家國亦惟卿等贊翼之功賜以酒殽及白金紵絲表裏  
辛丑進詩謝恩三月己酉扈駕回京賜青紅氍毹子駝褐  
九年九月榮復扈車駕巡邊給以天閑名馬光祿寺日  
供酒饌至洗馬林而還比還恩賚甚厚正統十四年七  
月邊人額森入侵司禮監太監王振勸親征上親征時  
學士曹鼎及張益等扈從八月遇敵於土木鎮鼎及益

皆沒宣德四年正月丁巳大學士楊榮扈駕南郊賜金  
銀鮮果等物弘治十六年上郊祀大學士李東陽等候  
駕畢宿神樂觀特賜者三東陽等為詩記之嘉靖十五  
年三月清明節令上躬詣天壽諸陵命日講官顧鼎臣  
謝丕張璧暨臣道南蔡昂扈從十八年三月大狩龍飛  
扈從則儒臣陸深等臣道南祇謁於鍾祥上命賜光祿  
酒飯蓋渥恩也

留守



永樂六年上將巡狩命尚書蹇義金忠大學士黃淮左諭德楊士奇留守諭曰朕留汝四人居守猶唐太宗簡輔弼監國必付房玄齡卿等其識朕意又以幾務事繁復命修撰王直副之凡南京政務惟文武除拜四夷朝獻邊警調發上請行在若祭祀賞罰一切之務有司具成式啟聞明年春車駕隨行十一年再巡命淮等與洗馬楊溥留守十五年春復巡北京留義與士奇居守以侍讀梁潛副之會謀譖監國者事連潛十六年九月寘潛及司諫周冕於法皆漢庶人

為之也惟士奇免咎宣宗在東宮受命祀陵因留南京監國舊臣曾棨輩皆從焉是年五月楊士奇黃淮楊榮佐鄭襄二王監國宣德元年上親征漢藩淮以病不行留佐監國正統十四年七月上自將北征命邸王居守每旦於闕左門西面受羣臣謁見朝政皆太監令英佐理學士陳循高穀留守迎駕

永樂八年七月車駕還自北征皇太子遣大學士黃淮往迎至滁州朝見洪熙元年五月宣廟召自南京大學

士楊榮往迎於德州景泰元年八月十三日英宗自北狩回鑾遣學士許彬迎於宣府商輅迎於居庸關十四日駕至上關輅進見英宗命輅草書二封達於皇太后入居於南內重華宮正德十五年十月武宗南征凱旋駐通州者久之楊廷和等出迓上戎服而入十六年三月大學士梁儲等迎令上於行宮

充使

皇太子及親王冠禮內閣官充賓贊婚禮充納徵等使

冊封諸王及妃內閣官充正使若冊封副使以本院官充者自成化末侍讀江瀾始也永樂洪熙宣德三朝冊封諸王及妃內閣楊榮金幼孜各充正使者二自後內閣不復出使於外惟冠婚大禮則用舊規宣德三年三月癸未楊榮奉命持節冊中宮禮成賜白金鈔幣若本院官以事出使者洪武三年五月遣編修蔡玄等訪歷代帝王陵寢以聞永樂中修撰陳循被命往南京文淵閣取儲書之類是也

遠使

凡朝鮮安南國頒詔及冊封學士等官充正使禮部預  
奏請特旨點用按洪武初侍讀學士張以寧使安南冊  
封未至而國王死國人請授其世子以寧不聽遣人請  
命於朝且教其世子服三年喪拜令其國人效中國頓  
首稽首禮朝廷嘉之賜以勅書比之陸賈馬援御製詩  
以獎諭之於是復命編修王廉吏部主事林唐臣充弔  
祭使以往且封其世子陳日燧為王既至其君臣出迎

於郊乃奉御製文於綵輿迎入成禮而還四年二月戊午以寧等三人還自安南以寧卒於道日燧遣陪臣阮汝亮偕廉來上表謝恩貢方物上即拜廉為工部員外郎旌其勞也廉固辭不拜出丞澠池十二年十二月壬戌遣編修羅復仁兵部主事張福齋詔諭安南占城及復仁還擢弘文館學士永樂初遣待詔王延齡使朝鮮行人朱彬副之賜衣一襲及鈔錠錦衣皮裘狐帽自後使二國者俱賜一品服其禮益隆云安南正統中請封

侍讀學士錢溥充正使其王桀驚不恭授受迎拜不如  
禮溥以書累爭之而後定弘治初侍講劉戩使安南考  
地志由陸南寧坦甚無虞乃乘肩輿從兩僮忽抵其界  
夷人傾駭至之日頒詔明日燕畢遂行餽贖一不受追  
送諸途不與語獨書其入關詩與之曰歸裝有一南物  
者關神其亟後陪臣入謝表有廷臣清白之語當時莫  
不多戩正德初侍讀徐穆充正使頒正朔於朝鮮及譯  
告國王不郊候迎詔不道跪穆援古義稽令制反復辨

析皆如議王屢遣陪臣代質疑義穆剖析不遺凡所覈  
遺悉拒弗納人咸稱之六年編修湛若水充安南冊封正  
使獨和其王贈詩一章論者謂得體云

### 巡行

洪武元年八月命儒臣十人分行十道訪求賢哲隱逸  
之士於是學士詹同等往焉

### 攝憲

洪武初編修王璉等攝行御史璉按河南入對稱旨上



悅謂近臣曰文華堂諸生如璉等皆異日將相才也九年三月丙子以璉及編修馬亮任敬王懌陳敏張惟典籍王偁應奉殿摺侍儀使孫化秘書直長蕭韶贊讀閻裕起居注嚴銳給事中方徵彭通宗善王惟吉十六人為監察御史十年正月乙丑復命編修葉慎陳晟署監察御史二十年復以編修景清為監察御史尋署僉都御史其重憲職如此永樂末侍講李時勉修撰羅汝敬皆降監察御史是又與洪武時異矣

分鎮

正統十四年八月命侍講徐瑄等十五人分鎮要地理得  
彰德瑄即有貞也成化中修撰張頤擢僉都御史巡撫居  
庸豈援此以為例歟

代祀

凡祈告代祀多用本院儒臣正統乙丑浙江台寧等府民  
遭疫死甚衆上遣禮部侍郎兼侍講學士王英齎香幣往  
祀南鎮以禳民癘時浙間久旱英至紹興大雨水深二尺

灌獻之夕雨止見星明日又大雨田野霑足人皆喜曰此侍  
即雨也布政使孫原貞等陪祀請為御祭感應記刻石於廟  
而還景泰辛未夏不雨特遣侍講學士劉鉉祀濟瀆成化甲  
辰陝西旱遣禮部左侍郎兼學士徐溥代祀中鎮河海瀆  
諸神雨輒應丁酉朝廷用儒臣議追崇先聖禮樂遣學士  
王獻祭告闕里弘治己未六月孔廟災學士李傑奉詔祭  
告甲子閏四月孔廟重建落成復遣大學士李東陽祭告

陪祀

凡郊祀五品以上官例得看牲次早復命陪祀皆預若分獻用文武大臣及近侍官太常寺請旨點充故本院官自檢討以上皆預永樂中修撰馬鐸建言國子監分獻十哲宜用翰林院官今上肇建園丘分獻大明夜明周天星辰雷雨風雲四壇方澤分獻五嶽五鎮四海四瀆四壇俱用輔臣分獻及帝社稷壇用日講官陪祀

讞獄

洪武十四年十月癸丑命法司論囚擬律奏問從翰林

院給事中及春坊正字司直郎會議平允然後覆奏論  
決永樂二十二年十月丁巳大理寺奏決重囚仁宗召  
大學士楊士奇楊榮金幼孜諭曰比歲法司濫刑往往  
出於鍛鍊先帝嘗切戒之故死刑至四五覆奏而後決  
自今審錄三法司必會三學士同審正統中侍講學士  
馬愉嘗奏讞獄終年不決者朝廷從之由是冤抑多伸  
理惜其未能復洪武之舊也

主宴

凡筵宴之錫賚臣下者令大臣待之謂之主宴天順四年天下諸司官吏朝覲至京上召大學士李賢諭曰黜陟之典亦當舉行其才行超卓政績顯著者布政以下賈銓等十人賜以衣服褚幣禮部筵宴命大學士李賢及尚書王翱待宴以勵其衆正德以來武舉會試宴例用內閣大臣一員主席兵部先期奏請嘉靖壬辰四月望令上命臣道南臣王用賓典武舉命成國公朱鳳尚書王憲待宴

齋宿

凡郊祀洪武二年定齋戒日期文武百官先沐浴更衣  
本衙門宿歇次日聽誓戒畢致齋三日宗廟社稷亦致  
齋三日惟不誓戒或朝廷祈禱亦如之成化丙申十二  
月十日禱雪致齋於翰林院之東署侍讀倪岳侍講程敏  
政修撰陸欽編修陸簡同宿是夜雪大作遂用歐公禁  
體故事相與闔韻聯句以志喜鈞奇競勝達旦弗能休  
前輩風致可想見也

習儀

翰林舊不習儀以禮所自出故也成化十四年冬至上命學士而下俱依常叅官赴朝天宮習儀至今循之

陵祀

洪武八年十月乙卯詔翰林院考定陵寢朔望節序祭祀禮部學士樂韶鳳等奏今擬每歲元旦清明七月望十月朔冬夏二至日用太牢其伏臘社每歲朔望日則用特羊祠祭署官行禮如節與朔望伏臘社同日則用



節禮從之其後清明中元冬至祭祀列聖陵寢分遣  
勳戚大臣行禮本院官例用二員陪祭永樂元年太祖  
皇帝忌辰上率諸王詣奉先殿行禮畢仍率百官躬詣  
孝陵致祭令近侍官於殿前行禮



殿閣詞林記卷十九

欽定四庫全書

史部

殿閣詞林記卷

二十一  
二十二

詳校官侍讀<sub>臣</sub>陳萬青

刑部郎中<sub>臣</sub>許兆椿覆勘

總校官進士<sub>臣</sub>繆琪

校對官中書<sub>臣</sub>雷純

謄錄監生<sub>臣</sub>李玉瓚

欽定四庫全書

殿閣詞林記卷二十

明黃佐

廖道南撰

授經

國初置大本堂取古今圖書充其中召四方名儒教皇太子親王用學士宋濂待制兼編修王禕修撰王俱者儒陶凱輩分番夜直選才俊之士充伴讀所授經書必親督之嘗命禕采故實韻為四言詩以授皇太子上時

賜燕賦詩商確古今評論文字無虛日尋命勛舊之子  
執經入侍於是鄭國公常茂曹國公李景隆蘄春侯康  
鐸等與焉洪武元年十一月辛丑燕東宮官及儒士各  
賜冠服是日上命大本堂諸儒作鍾山蟠龍賦置酒懽  
甚乃自作時雪賦故有是賜其後皇太子讀書在文華  
殿而親王則出就所居府十二年三月戊辰朔上御華  
蓋殿皇太子侍上問比日所讀何書對曰昨看書至商  
周之際上曰看書亦知古人為君之道否因諭之曰君

道以事天愛民為重其本在敬身人君一言一行皆上  
通於天下繫於民必敬以將之而後所行無不善善天  
必鑒之不善天亦鑒之一言而善四海蒙福一行不謹  
四海罹殃言行如此可不敬乎汝其敬之聖祖之詒訓  
如此真可謂得其大本矣諸儒授經惟奉行上意而已  
嚴君在上賢師友輔之睿德之懋斯可望矣

賓客

太祖始令宋濂為諸王世子師庚子年十月奉命入內

授經遇綱常大義再三言之乙巳年三月濂以起居注告病詔還家仍賜金帛世子致贈有加焉六月濂上箋謝恩復奉書東宮勉以孝友恭敬勤敏讀書無怠慢無驕縱修德進業以副天下望上覽書喜甚召東宮語以書意且賜書荅之其畧曰昔先生教吾子以嚴相訓是為不佞也以聖人文法變俗言教之是為䟽通也所守者忠貞所用者節儉是為得體也昔聞古人今則見之復以文綺侑書洪武元年設東宮師傳官令勲臣兼之

十月以耆儒梁貞王儀為太子賓客秦鏞盧德明張昌  
為太子諭德上以東宮師傅皆勲舊大臣當待以殊禮  
朝賀東宮難同庶僚命禮部考古定儀禮部及翰林諸  
儒臣議今凡遇大朝賀前期設皇太子座於大本堂設  
荅拜褥位於堂中設三師賓客諭德拜位於堂前贊禮  
二人位於三師之北內贊二人位於堂中俱東西相向  
至日皇太子常服陞座三師賓客諭德常服入位北向  
立皇太子起立南向贊禮唱鞠躬四拜皇太子受前二



拜荅後二拜禮畢而出五年太子贊善大夫宋濂輔導  
東宮一言一動皆以禮法諷諭使歸于道每侍讀書至  
切於政教及前世興亡必拱手揚言曰君國子民之道  
當如是不當如彼且推人情物理以明其義皇太子每  
歛容嘉納敬禮未嘗少衰言則必曰師父師父云且書  
舊學二字以賜二十六年七月戊申選秀才張宗濬等  
隨詹事府左春坊官分班入直文華殿侍講畢近前說  
民間利害田里稼穡等事間陳古今孝弟忠信文學材

藝諸故事日以為常永樂中楊榮輩在春坊每進講罷必從容以正身務德親賢去邪尚儉戒逸之言進或訪以政務必陳其切要及先後緩急施行之序皆懇切無少避忌皇太子每以忠直稱之時贊善徐善述王汝玉尤見親禮嘗令善述擇選詩二十餘首分類賦比興以為法又與之書言欲學作表卿可一如詩題立例具詩題與表題間日封進且問其疾勞慰備至且曰卿今年邁恐輔余為勞似卿朴直苦口者百無一二面諛順顏

者比比有之。卿康健無憚勞，弼余成業，惟望藥石之言。日甚一日，毋務犯鱗觸諱之慮。其所與書必字之曰好。古或曰致書贊善好古先生云，其與汝玉書有曰願求致治之方，又曰善政之音，至有如暗逐明之喻。其望啟沃之切如此。每遇節序，燕勞東朝之臣，起居慰問，煦嫗諄切，一如家人父子焉。然成祖常恐東駕親近匪人，每北巡必訓戒之。又廣求名儒與之講學，於是命侍讀學士王達、洗馬楊溥、修撰梁潛、典籍金寔、郎中葉砥等分

直講讀亦有選自教官者惟在得人而已故仁宗之為  
皇太子也監國視朝之暇專意文事手不釋卷被服寬  
博大類儒者蓄經籍法書富甚云

講儀

東宮講讀儀春坊官與翰林院官日分二員講書以尚  
書春秋通鑑大學衍義貞觀政要等書進講頒要纂其  
事之始終直述大義輯成篇章進呈御覽畢然後赴文  
華殿講說三師三少及詹事府官鴻臚寺并每科給事

中一員侍立進講畢衆官齊出及有召問亦須前項一員官同進出如有獨進并獨員留後者許給事中鴻臚寺官并司直郎清紀郎糾劾凡講讀畢每遇上位發落過五府軍政六部緊要事務及撫諭四夷恩意其大經大法詹事府官同春坊官將緣由於衆官未退之時一敷陳焉永樂二年七月侍讀學士王達講乾之九四舉儲貳為說仁宗在東宮問楊士奇曰達含譏否士奇因舉程子云凡卦中六爻聖賢有聖賢用衆人有衆人

用君有君用臣有臣用無所不通又舉王昭素對宋太祖之言以對仁宗因命解縉專閱書胡廣閱詩金幼孜閱春秋士奇閱易仁宗問儲貳說有據否士奇對以胡瑗之說甚喜自是講義有疑必召四人相與辯析暢而後已遂命春坊司經局臣分錄講章以備常閱

出閣

永樂以前儲宮皆年長始出閣英宗未及出閣遂登大寶故出閣之儀至天順二年始定其講學師友惟用東

宮官及本院官分班講讀內閣提督之不別選他職其講讀侍班及正字官從內閣具名奏請每日講書直解先送內閣定講畢補進與經筵同以史官修撰編修兼之校書正字以制勅房官兼之會典載初出閣議云是日早侍衛侍儀如常儀執事等官於文華殿行四拜禮畢鴻臚寺請皇太子陞文華殿執事官導引至殿陞座師保等官于丹陛上行四拜禮畢各官退出內侍官導皇太子至後殿陞座以書案進每日侍班侍讀講官以

次進讀叩頭而退每日讀講儀云每日早朝退後皇太子出閣陞座內侍以書案進不用侍衛侍儀執事等官惟侍班侍讀講官入行叩頭禮畢分班東西向立內侍展書先讀四書則東班侍讀官向前伴讀十數遍退復原班次讀經書或讀史書則西班侍讀官向前伴讀亦如之務要字音正當句讀分明讀畢各官退每日巳時侍班侍讀侍講及侍書官候皇太子陞座畢入東西向立侍班內侍展書先講早所讀四書則東班侍講官進



講一遍退復原班次講早所讀經書史則西班侍讀官  
進講亦然務要直言解說明白易曉講畢內侍收書訖  
侍書官向前侍習寫字務要開說筆法點畫端楷寫畢  
各官叩頭而退午後從容遊息或習騎射晚讀本日所  
授書各數遍至熟而止凡讀書三日後一溫須背誦成  
熟遇溫書日免授新書講官通講須曉大義凡寫字春  
夏秋月每日寫一百字冬月每寫五十字凡遇朔望節  
假及大風雨雪隆冬盛暑暫停讀講寫字今按此儀稍

變永樂之舊矣成化中孝宗出閣最勤學十九年御製  
文華大訓成少詹事彭華進講左中允周經預講是書  
東宮每起立拱聽內閣輔臣請坐講從之弘治中武宗  
在東宮學士吳寬率同僚上疏曰竊惟東宮講學自寒  
暑風雨朔望令節外一歲之中不過數月一日之內不  
過數刻况八歲出就外傳居宿於外誠欲離近習親正  
人也庶民且然况有天下者乎

### 儲典

洪武中定儲宮奏事皇太子御文華殿官負人等承旨  
召入者方許入凡啟事者稱臣會典載東宮朝儀云永  
樂二年定文武官負常朝行叩頭禮畢三師三少詹事  
府官左右春坊官翰林院鴻臚寺等官六科給事中錦  
衣衛官左右序立於文華殿門之外鴻臚寺序班通政  
舍人引文武百官於丹陛上丹墀內東西序立照依衙  
門資次啟事御史二員司直清紀日輪二員北向侍立  
糾儀啟事畢百官齊退及有召問亦須前項官員一同

進出如獨進并獨負留後者許監察御史鴻臚寺官司  
直清紀糾覈凡合啟事務在京衙門止用奏本其詹事  
府主簿錄事同春坊司直清紀司諫分為六科將本內  
啟過事件同六科給事中逐一奏聞主簿錄事司直清  
紀司諫仍於司禮監共開揭帖開寫逐日啟過本內事  
件畧節緣由六科給事中亦具題帖各另奏進凡遇正  
旦冬至節行慶賀禮并進歷進春等事詹事府例該啟  
皇太子知必先奏聞候得旨方具啟本進凡遇皇太子

千秋節行慶賀禮奏啟本同進侍班用坊局官正旦冬至千秋節禮部官進箋并進歷進春通事二員舉案又有監國等儀

嗣輔

皇太孫輔導講讀在洪武時具載集禮成祖時以東宮官僚兼之永樂六年七月命內閣胡廣等輔導皇長孫勅曰朕惟令德所成本乎天性養性之學實弘聖功故有聰明純一之資必有詩書禮樂之教所以充德性而

廣器識也朕嫡長孫天章日表玉質龍資孝友英明寬  
仁大度年未一紀體志具寧動必中規言必合道好道  
之篤日夜孜孜日誦萬言心領要義朕嘗試之以事輒  
能裁決得中斯實宗廟之靈上天錫慶篤生異質以福  
祐天下而基命於無窮然宏材之建必由匠石之功圭  
瓚之成必假琢磨之力卿等皆茂簡德藝職輔東宮東  
宮之子必資兼弼宜協同心志輔導于成推廣仁義道  
德之源開陳二帝三王之治與太祖高皇帝之大經大

法凡創業守成之難生民稼穡之事朝夕講論以涵養  
本源恢弘智量充其盛大之器以為宗社生民之福國  
家有無窮之休卿等亦有無窮之聞欽哉九年九月皇  
太子命楊榮等侍諸皇孫讀書文華後殿且諭諸皇孫  
曰此皇祖近臣汝輩當加禮敬又謂榮等曰他日學成  
即汝訓迪力也後皇太子復傳上命召翰林院吏部官  
令舉老成正大儒者侍皇太孫講讀明日東宮特召尚  
書蹇義及楊士奇問得人否義對曰臣兩人共舉禮部

侍郎儀智然衆鮮知之議尚未決東宮曰往者曾舉李繼鼎大誤後悔不及智甚端正但覺老矣士奇對曰智雖老然起家學官道理明執守正精神不衰廷臣老成未見其比是日午朝上喜曰此得人矣雖年耄識朝廷大體能直言不阿向之元正日食呂震等皆欲行賀禮惟此老與楊士奇言宜免賀朕從之智誠可用遂召禮部翰林諸臣諭曰儀智甚好朕知之矣今侍太孫講讀令右贊善陳濟等充講官教諭林長懋張英陳山戴倫



等授給事中使侍太孫已而俱授春坊左右中允

### 制度

聖祖有天下之初凡制度命儒臣稽考古今因革之宜以聞中書省具奏上為裁定於是宣國公李善長學士陶安集諸儒論建以適厥中自朝廷以達邦國品式明備洪武元年二月安等奏定天子冕服之制上曰古禮太繁今祭天地宗廟則服衮冕社稷等祀則服通天冠絳紗袍餘不用十一月甲子禮部翰林院等官議乘輿

以下冠服之制三年六月中書省臣與翰林院定文武  
官朝服之制四年正月戊子禮部太常司翰林院議奏  
上親祀圜丘方丘宗廟及朝日夕月服袞冕祭星辰社  
稷太歲風雲雷雨嶽鎮海瀆山川先農皆用皮弁服羣  
臣陪祭各服本品梁冠祭服五年五月癸卯親王儀仗  
車輅成亦禮官諸儒所定也八月乙亥禮部及翰林院  
議省牲宜用常服十六年七月戊午詔更定冕服之制  
先是禮部言虞周以來冕服制度不同宜加考定命翰

林諸臣議從之二十年冬十月詔六部都察院通政使司左右春坊大理寺及本院官著禮儀定式合行事宜凡一十四款詔頒行之二十四年六月己未詔六部都察院同翰林儒臣叅考歷代禮制更定衣冠居室器用制度於是羣臣斟酌損益以聞二十九年十一月詔翰林議定制凡官民房屋墳塋等第及食祿之家禁例為書名曰稽古定制頒行天下總載集禮及憲綱事類肇自洪武中載都察院十三道御史所宜行者宣德中

勅禮部同翰林院考舊文而申明之凡祖宗所定風憲事體悉載其中至正統四年十月始頒行云

律令

吳元年十月詔修律令命學士陶安為議律官十二月甲辰律令成命刊布洪武元年正月大明令成修列吏戶禮兵刑工六官之條大明律亦如之上曰律令者治天下之法也令以教之於先律以齊之於後今所定律令刪繁就簡使之歸一直言其事庶幾易知而難犯八

月己卯上念律令尚有輕重失宜有乖中典命儒臣四人同刑部官講唐律日寫二十條取進止擇其可者從之其或輕重失宜則親為損益務求至當六年十月命刑部與翰林院更定大明律學士宋濂撰表以進二十二年八月命翰林院同刑部官將比年律條參考折衷以類編附曰名例律附於斷獄下至是特載諸篇首頌行之

封爵

洪武三年十一月丙申大封功臣其五等封爵皆學士  
宋濂所定始制五等公曰國侯伯曰郡子男曰縣至是  
罷子男不封惟繫公於國各錫之鐵券云二十三年九  
月乙未加封中山王徐達岐陽王李文忠二代皆王爵  
侍講學士葛鈞等奏王及三代惟本朝開平王常遇春  
出自特恩上謂二三皆元勲宜如開平王例自今開國  
功臣沒後俱追封三代其襲爵子孫非建奇功者生死  
止依本爵其券文誥命皆詞臣撰進先是五年三月命

學士宋濂參考唐宋誥命皆三省官列銜書名復用吏部告身等印章本朝誥勅既用御寶則省臣不敢署名考宋紹興間二部言官誥院所有綾紙易以偽冒下文思院別織花樣今議於誥尾添織字號以為關防及取工部神帛勅誥局造完書寫頒于文武官從之九年四月癸卯命中書省兵部定給武官誥勅大都督府咨中書省送兵部覆奏貼黃考功監參考同奏翰林院撰文付司文監投勘奏付中書舍人書寫十六年三月命中

書省與翰林院定嫡妾封贈例及文官贈蔭叙之例二十四年五月辛卯詔定文武官封贈舊制兵部試尚書茹瑞請上命翰林院考古制學士劉三吾奏宋制母以子貴詔從舊制瑞又奏庶子襲父職例止封贈嫡母復命禮部翰林院同考古制三吾奏宋制母以子貴庶母亦依所生子之秩詔從宋制六月丙寅命禮部翰林院議軍官姪男替襲伯父職事及弟襲兄職義子女婿承襲養父妻父封贈禮制八月己巳瑞又奏言武臣封贈



父母妻姓名有以嫡母生母同請有以正妻次妻並書  
乃命翰林院稽考古制學士劉三吾言宋制嫡母繼母  
亡許封贈所生母正妻有子無子皆得封贈上命只封  
嫡母正妻其所生母從宋制永樂元年十一月乙亥廣  
平侯袁容嫡母孫生母劉俱亡獨繼母羅氏在而封贈  
事例不同學士解縉等議上若所生母與繼母同在禮  
難並封今繼母在當封所生母并嫡母俱亡亦可一體  
追封從之仍命後不為例

訂音

聖祖嘗召學士樂韶鳳宋濂待制王僎修撰李叔允編  
修朱右趙堦朱濂典簿瞿莊鄒孟達典籍孫蕢達魯與  
權諭之曰韻學起於江右殊失正音有獨用當併為通  
用者如東冬青青之屬亦有一韻當析為二韻者如虞  
模麻遮之屬若斯之類不可枚舉卿等當廣詢通音韻  
者刊定韶鳳等奉詔撰成七十六韻共十六卷書奏賜  
名曰洪武正韻濂序曰古者之音惟取諧協故無不通

江右制韻之初但知從有四聲而不知衡有七音故經  
常不交而失立韻之原七音者牙舌唇齒喉及舌齒各  
半是也分其清濁定角徵宮商羽以至於半商半徵而  
天下之音在是矣然則音者其韻書之權輿乎旋宮以  
七音為均均言韻也能推十二律以合八十四調旋轉  
相交而大樂之和亦在是矣自從奏啟進呈文字點畫  
音韻並從是書洪武二年四月命翰林院定官民書禮  
儀式禁革民間名字有先聖先賢大國君臣并漢晉唐

宋等字者中書省臣具奏行之若正統十年進士登科錄凡天字皆作茂云出內閣意景泰中幸太學表內閣自為之中有管窺霄螽測海句蓋亦避天字也與宋宣和時禁君天等八字同殆非洪武舊制矣

### 祀祀

聖祖肇正祀典首詔岳瀆城隍等神皆削去後世所加封號止從實稱之惟孔子則仍其舊洪武元年遣官釋奠於先師孔子定以二丁降香遣官祭於國子監每二

丁傳制遣官致祭孔子若登極皆遣官祭告闕里二十四年十月乙丑南豐縣典史馮堅言九事內一事歷代忠臣烈士有功德於民者宜勅有司訪其事蹟俾禮部翰林院考究明白量加封謚上寵擢之二十六年頒大成樂於天下府學令州縣如式製造以祀孔子二十八年用儒臣言黜莽大夫揚雄進董仲舒從祀孔子正統二年從本院議進胡安國蔡沈真德秀從祀八年追封元吳澄為臨川郡公從祀後建言者謂當祀劉因及薛

瑄內閣劉定之駁二人皆無著述遂沮然澄實宋進士  
仕元失節識者非之學士丘濬嘗著論許衡無益於名  
教則澄可知也成化二年用大學士商輅議封仲舒為  
廣川伯安國為建寧伯沉為崇安伯德秀為浦城伯從  
之輅又請加孔子以道配天地之號事寢不行弘治九  
年追封宋楊時為將樂伯從祀言者因謂羅從愿李侗  
亦同從祀禮部侍郎傅瀚言二子著述視尹焞游酢謝  
良佐未知所先後二子從祀則三人似不可遺乃止先

是元年八月侍讀學士程敏政建議欲將馬融劉向賈  
逵王弼何休戴聖王肅杜預褫爵罷祀鄭衆盧植鄭玄  
服虔范甯五人各祀于其鄉而增后蒼若荀况言性惡  
宜依揚雄例黜之時祀王通七十弟子中申枏申黨疑  
誤當為一人宜存枏去黨公伯寮秦冉顏何蘧瑗林放  
五人既不載於家語亦宜罷去顏子曾子子思配享於  
殿而父在兩廡非所以明倫宜別立一祠中祠啟聖王  
以杞國公顏無繇萊蕪侯魯點泗水侯孔鯉并邾國公

孟孫氏配享其程珦朱松量加封爵祀焉祭酒謝鐸建  
議則謂吳澄出處不正當黜其祀俱詔廷臣議之學士  
吳寬言從祀苟有益於經傳則楊雄馬融昔皆不廢尚  
書倪岳亦言馬融王弼之徒其立身不無可貶然秦漢  
以來六經出於煨燼賴諸子抱遺經專門講授經以復  
存自唐之註疏多祖其言今之經傳引用尚多其說何  
可盡廢七十子名字馬遷以來相沿已久今生千百年  
後何可臆定於是咸仍其舊云嘉靖九年臣道南寓史



館欽奉上親製正孔子祀典說大旨謂孔子生于周作春秋周文武止稱為王春秋繫王于天孔子之道王者之道也功王者之功也而位則非王者之位焉後世稱之以王不若尊之以師於是毀其像厝之主曰至聖先師孔子顏子曰復聖曾子曰宗聖子思曰述聖孟子曰亞聖則列名先賢七十二子曰先賢從祀諸儒則列名先儒特建啟聖祠于學宮之後別祀叔梁紇以顏無繇魯楮孔鯉配尊賢賢各盡其道矣

定名

聖祖有天下之初追尊四代考妣為帝后其廟號尊諡皆學士朱升等所定凡皇子命名受封及公主封號功臣爵名皆學士宋濂等擬奏取自上裁尋又命正天下合祀神祇名號洪武九年四月天下驛傳多因俗名兵部且數命翰林院考古正之凡二百三十二自後凡建置郡縣命名皆以屬焉會典云凡皇子名及各王府奏請子名親王公主及郡王郡主縣主郡君縣君鄉君封

號俱內閣擬奏請旨點用

紀元

國初紀元洪武出自聖祖親裁繼世之後始命翰林儒臣擬奏擇而用之成祖即位始擬用永清後用永樂自是每朝紀年不復再改蓋聖祖詒謀之善實前代所未有也英廟復辟召內閣高穀商輅至文華殿問曰今年號宜改否穀對曰周雖舊邦其命維新宜改維新元年輅曰年號多與前代同者臣等具數年號請旨上稱善

已而用徐有貞等言用天順改元或請去景泰故號仍紀正統上不從改天順今上初登大寶輔臣擬明良善治上特用嘉靖盖有商高宗嘉靖殷邦之志云

### 藩規

洪武中命選儒士授本院博士等職事令於各王府說書永樂中妙簡宮僚以輔諸王以詹事府丞周孟簡為襄王府左長史司直郎金實為衛王府左長史俾侍講讀其後親王出閣止選進士中老成有學者除檢討及

就封即拜長史弘治三年進士被是選者恣言怨詈吏部黜之會典云諸王讀書內閣提督檢討等官講讀為擬定經書起止所習倣學每日進看其儀天順二年定擬初入書堂其日早王至右順門之北書堂面東中坐提督講書并講讀官行四拜禮畢內官捧書展於案上就案左立講讀官進立於案右伴讀十遍叩頭退每日講讀清晨王至書堂講讀官行叩頭禮伴讀十遍出飯後復詣書堂伴讀看寫字畢講書直說大意畢仍叩頭

退內侍以所寫字送內閣

書翰

書雖六藝之一然事屬天家須為帝制亦不可以為末  
務成祖喜楷書時典籍沈度書法豐潤上深愛之每有  
大制作必命度騰寫累遷至學士惟支俸仍事書辦賜  
象笏鏤金刻度姓名其上以寵耀之其弟彛亦起自書  
辦累官侍讀自此沈字盛行於世宣宗自沖齡習古法  
帖宸翰妙絕蓋始學趙孟頫而加道勁出神入天者矣

孝宗亦愛沈字宮中始習焉嘗訪其後得其孫世隆授中書舍人故制誥猶用沈體云今上宸翰天日昭回星斗經緯嘗親書四箴字暨皇史宬以示大學士李時衆皆忻服供奉諸僚各取其長云爾

扈蹕

聖祖御閱江樓及謁陵寢悉命詞臣扈從宣德五年二月宣宗謁天壽山時楊士奇金幼孜扈從嘉靖十五年三月今上禋祀諸陵命日講官顧鼎臣謝丕張壁及臣

與蔡昂扈從臣道南恭和御製詩二章云聖皇孝祀惻  
中腸陵殿春開俎豆張鳳麓遠蟠知地勝鸞輿端擁自  
天康雲連北極千關壯水接東溟萬里洋仰識駿圖光  
宇宙永占佳氣護封疆帝藻初裁錦繡腸昭回雲漢列  
星張禮崇天地追隆古道貫皇王邁小康百辟霽瞻容  
穆穆萬方春霽頌洋洋即看醴假登殷廟不獨巡游遍  
禹疆



殿閣詞林記卷二十